

մեկնել՝ հետը առնելով երևմտական նախարար Ա. Էնֆլանդանին, դիւղ. Յ. Փիրալեանին և սպայ Ս. Մելիքեանին:

Նոյն նպատակով, մարտ 12-ին Թիֆլիս դնաց և Հայ. Խորհրդի նախագահ Աւ. Սահակեանը՝ դիմելու համար դաշնակից ներկայացուցիչներին՝ պարէնի ու սերմացուի խնդրանքով:

Հայ. Խորհրդի ու կառավարութեան դիմումները, ինչպէս նաև արտասահմանում կատարւած աշխատանքները, վերջապէս, լուեցին, և օգնութիւնը շատ չուշացաւ: Այս անգամ օգնութեան հասնողը Ամերիկան էր՝ Միացեալ Նահանգների պարենաւորման դիկտատոր Հուվէրը, Եւրոպայի փրկիչը յետպատերազմեան սովից: Հուվէրը եղաւ և Հայաստանի ժողովրդի իրական փրկիչը: Ինչ և լինի մեր վերաբերումը դէպի Ամերիկայի քաղաքական դերը հայկական խնդրում, ամերիկեան մարդասիրական նպաստն ու պարէնը երբեք չենք մոռանալ, չպէ՛տք է մոռանանք:

Մայիսի քսանին Բաթում եկաւ ամերիկեան առաջին նաւը 125,000 փութ ալիւրով, մի շարաթ անցած, հասաւ ևս 600,000 փութ: Այդ մթերքը Հայաստան փոխադրելու համար վրաց կառավարութիւնը հայկական կառավարութիւնից պահանջեց 579 վագոն և 14 շոգեշարժ, ա՛յն ժամանակ, երբ Հայաստանի ունեցած վագոնների ընդհանուր թիւը 520 էր և շոգեշարժներինը՝ 16: Պէտք եղաւ ամերիկացիների և անգլիացիների միջամտութիւնը, 4 օրով կանգնեցւեց Հայաստանի երկաթուղային մարդատար հաղորդակցութիւնը և բոլոր միջոցները յատկացւեցին ալիւրի փոխադրութեան:

Ամերիկեան ալիւրի հասնելով՝ կամաց-կամաց սովը մեղմացաւ, երկիրը սկսեց մտնել բնականոն հունի մէջ, և ժողովուրդն ու կառավարութիւնը կարողացան նւիրել երկրի վերաշինութեան ու պետութեան կազմակերպման գործին: Յունիսին կառավարութիւնը հնարաւորութիւն ստացաւ Ախալքալաքի ժողովրդին էլ հաց հասցնել. վրաց կառավարութիւնը, որ այնքան եռանդ էր թափում Ախալքալաքը ստանալու համար, սովից կոտորւող ախալքալաքցիներին օգնելը իր պարտականութիւնը չէր համարում*):

*

Որքան էլ դժւար լինէր կացութիւնը, սովն ու հիւանդութիւնները չէին այլևս հայ ժողովրդին զրազեցնող գլխաւոր ցաւերը: Կառավարութեան առջև կանգնած էին մի շարք պետական ու ազգային լուրջ խնդիրներ, որոնց մէջ առաջին տեղը բռնում էին սահմանների ընդարձակման և ներգաղթի հարցերը: Հարցեր, որոնց վերաբերմամբ Անդրկովկասի անգլիական հրա-

*) 1919 թ-ի ընթացքում Հայաստանը Ամերիկայից ստացաւ 1,295,243 փութ ալիւր, 256,758 փ. ցորեն, 125,000 փ. լոբի, 68,563 փ. բրինձ, 20,000 փ. կորեկ, 8,010 փ. եգիպտացորեն, 10,738 փ. վարսակ, 5,950,000 տուփ խտացւած կաք, 12,000 փ. կակաօ, 44,000 փ. շաքար, 5,000 փ. ճարպ, 1,500 փ. բէշ: Համաձայն կնքւած պայմանի, 1920 թ-ի սկզբին էլ գալու էր 2,170,000 փ. ալիւր: Ամերիկայից ստացւող ալիւրից 238,449 փութ ուղարկւեց Ախալքալաք: Ալիւրի մի մասն էլ գրաւեց վրաց կառավարութիւնը, իբրև փոխադրութեան վարձագին: